

Euskarazko Doktorego Tesien IX. KOLDO MITXELENA sariak

Erabakia, 2025eko irailaren 12koa, Euskara eta Hizkuntza Plangintzarako errektoreordearena, Euskarazko Doktorego Tesien IX. KOLDO MITXELENA sarien deialdia egiten duena.

Euskal Herriko Unibertsitatearen eta Euskaltzaindiaren arteko Lankidetzeta-hitzarmenaren arabera, euskaraz egindako ikerketa bultzatzeko, erakunde biek bi urterik behin Euskarazko Doktorego Tesien KOLDO MITXELENA sarietarako deia egingo dute. Hitzarmen honen Jarraipen Batzordeak deialdien kudeaketari, oinarriari eta hautaketa-prozesuari dagokien guztia ebatziko du.

Euskal Autonomia Erkidegoko unibertsitate-mailako ekoizpen zientifiko gehiena Euskal Herriko Unibertsitateak sortzen du. Ekoizpen horren adierazle nagusietako bat EHUn urtero aurkezten diren doktorego-tesiak dira, 400etik gora. Tesi horien artean berrogeitik gora dira euskaraz idatziak, bai erabat euskaraz idatzita daudelako, bai nazioarteko doktorego-tesiei buruzko araudiaren barnean testuaren zati esanguratsu bat euskaraz dagoelako.

Euskarazko tesi horien ekarpena bikoitza da. Alde batetik, beste hizkuntzetan eginiko gainerako tesiek bezalaxe, jakintzaren sakontzea eta zabaltzea ahalbidetzen dute eta, bestetik, euskararen normalizazioaren prozesuan ere ezinbesteko laguntza eskaintzen dute.

Gure artean, Koldo Mitxelena zenak inork baino hobeto landu eta garatu zuen ekarpen bikoitz hori. Alde batetik, bere lan bikainei esker, euskarari buruzko jakintza zabaltzen eta sendotzen lagundu zuen, bai Euskal Herrian, bai nazioarte mailako ikerketa-sareetan. Bestetik, euskarak berak ez zuen lortuko gaur egun daukan garapena eta hedapena arlo akademiko eta zientifikoan Koldo Mitxelenak egindako funtsezko lanak kontuan hartu gabe. Ekarpen horiek, besteak beste, Euskal Herriko Unibertsitateko bere katedratik eta Euskaltzaindiaren baitan egin zituen. Irakasle eta euskaltzain bikainaren omenez, euskarazko tesien sari honek Koldo Mitxelenaren izena darama.

Horrenbestez, Euskal Herriko Unibertsitateak eta Euskaltzaindiak honako hau adostu dute: bi erakundeek arteko hitzarmenaren adosturikoa betetzeko eta euskarazko ikerketa bultzatzeko eta sustatzeko asmoarekin, "Euskarazko Doktorego Tesien IX. KOLDO MITXELENA sariak" deitzea. Hori guztia kontuan harturik, honako hau erabaki dut.

ERABAKIA:

1. Helburua.

Xedapen honen helburua da Euskarazko Doktorego Tesien IX. KOLDO MITXELENA sarien 2025. urteko deialdia egitea.

Bost jakintza-arlo nagusietan sari bana esleituko da: Arteak eta Giza Zientziak, Gizarte eta Lege Zientziak, Osasun Zientziak, Zientziak, Ingeniaritza eta Arkitektura.

2. Hautagaiak eta eskarien aurkezpena.

2022ko irailaren 1etik 2025eko uztailaren 31 arteko tartean euskaraz idatzi eta defendaturiko doktorego-tesiak aurkeztu ahal izango dira deialdi honetara. Europar Tesi edo Nazioarteko Tesi gisa aurkezturiko tesiak ere onartuko dira, erabilitako hizkuntzetako bat euskara izan bada. Tesia defendatu duen doktoreak berak aurkeztu behar du hautagaitza, idatzi honi loturik doan eskabide-orria eta tesiaren kopia bat aurkeztuz.

Eskariak **aurkezteko epea: 2025eko irailaren 15etik urriaren 6 arte.**

Eskaria egiteko, deialdi honi atxikitako inprimakia erabili behar da, eta EHUKo Erregistro elektronikoko orokorrean aurkeztu behar da (<https://egoitza.ehu.eus/opencms/system/modules/sede/index>) edo, hala badagokio, Herri Administrazioen Araubide Juridikoaren eta Administrazio Prozedura Erkidearen 39/2015 Legearen 16.4 artikulua ezarritakoaren arabera.

Honako dokumentazio hau aurkeztu behar da:

- Eskabide-orria beteta.
- Tesiaren kopia digitala: pdf formatuan.
- NANaren fotokopia.
- Curriculum Vitae osoaren kopia digitala, bereziki hirugarren atalean aipatuko diren merezimenduei buruzko argibideekin.

3. Balioespen-irizpideak

Epaimahaiak ez du tesiaren edukia epaituko, tesian erabili den euskararen kalitatea baizik, eta, behar izanez gero, tesiak komunitate zientifikoan lortutako eragina. Horretarako, batez ere idazkuntza-moldea eta terminologian eginiko ekarpenak hartuko dira kontuan.

Hizkuntzaren kalitateari dagokionez epaimahaikideek tesi bat baino gehiago berdin balioetsiko balute, honako irizpide hauek ere har litezke kontuan baremoa doitzeko:

- Tesian oinarrituriko argitalpen edo patenteen kopurua.
- Tesiaren edukiak hedatzeko asmoz kongresuetan eginiko aurkezpenak.
- Tesiak arlo zientifikoan lortutako eragina (tesiari buruzko aipamenak liburu edo aldizkarietan; doktoreak emandako hitzaldiak).

- Tesiarekin loturiko egonaldiak beste erakunde akademiko batzuetan.
- EHUKo Hizkuntza Zerbitzuek hartuko dute irabazlea izendatzeko azken erabakia.

4. Epaimahaia

Eskariak aztertzeko epaimahai bat eratuko da. Honako kide hauek osatuko dute epaimahaia:

- 1-. Epaimahaiburua, EHUKo Euskara eta Hizkuntza Plangintzarako errektoreordea, edo hark izendaturikoa.
- 2-. Epaimahaiburuordea, Euskaltzaindiaren Iker sailburua.
- 3-. EHUKo Hizkuntza Zerbitzuen zuzendaria.
- 4-. Bost jakintza-arloetako bina doktore, EHUKo Euskara eta Hizkuntza Plangintzarako errektoreordeak izendatutako bana eta Euskaltzaindiko presidenteak izendatutako beste bana.
- 5-. Euskara eta Hizkuntza Plangintzarako Errektoreordetzako teknikari bat, idazkari lanak egingo dituen. Iritzia eman ahal izango du, baina ez du botoa emateko eskubiderik izango.
- 6-. Ohorezko buruak: EHUKo errektorea eta euskaltzainburua. Ohiko bileretara joateko premiarik ez dute. Halere, epaimahaiburuak edo epaimahaiburuordeak eska lezakete bileraren batera deitzea, iritzia eman dezaten. Ez dute botorik.

Tesiak aztertuko dituzten epaimahaikideek, eskariak aztertu ondoren eta balioespen-irizpideak kontuan hartuta, sariak nori eman proposatuko diote EHUKo Euskara eta Hizkuntza Plangintzarako errektoreordeari. Epaimahaiaren ustez, aurkezturiko lanak saritzeko modukoak ez balira, sariak eman barik gera litezke.

5. Erabakia

Epaimahaiaren proposamena ikusirik, EHUKo Euskara eta Hizkuntza Plangintzarako errektoreordeak, Euskaltzaindiaren Iker sailburuarekin adostuta, dagokion erabakia hartuko du. Lanen egileei banaka jakinaraziko zaie saridunak direla, eta bi erakundeen webguneetan argitaratuko dira sarituen zerrendak.

6. Sariak

Arlo bakoitzeko irabazleak diploma eta 3.000 € gordin jasoko ditu.

7. Erregimen Juridikoa

Deialdi honen oinarrietan argi eta garbi aurreikusten ez den kasuetan, honako hauek aplikatuko dira: abenduaren 21eko 20/2023 Legea, Dirulaguntzen Araubidea Erregulatzekoa dena, eta abenduaren 17ko 698/1991 Dekretua, Euskal Herriko Autonomi Erkidegoaren aurrekontu orokorren kargurako subentzioen berme eta atzera itzulketen erregimen nagusia arautzen duena.

8. Errekurtsoak

Erabaki honek eta deialdi honen barruan hartutako gainerako erabakiek administrazio-bidea amaitzen dute. Haien kontra aukerako berraztertze-errekurtsoa ezarri ahal izango da, Euskara

eta Hizkuntza Plangintzarako errektoreordearen aurrean, hilabeteko epean, erabaki hau argitaratu eta hurrengo egunetik zenbatzen hasita; administrazioarekiko auzi-errekurtsoa ere ezarri ahal izango da, zuzenean, dagokion administrazioarekiko auzi-jurisdikzioan, berdin zenbatutako bi hilabeteko epean.

Leioan, 2025eko irailaren 11an

Igone Zabala Unzalu
UPV/EHUko Euskara eta Hizkuntza Plangintzako errektoreordea